



Na osnovu Zakona o osnovnom obrazovanju i odgoju ("Službene novine Kantona Sarajevo" br. 7/98 i 9/2000), i člana 18 Pravilnika o praćenju, vrednovanju i ocjenjivanju učenika osnovnih i srednjih škola Kantona Sarajevo donosim

KRITERIJE O IZBORU UČENIKA GENERACIJE OSNOVNE ŠKOLE

I OPĆE ODREDBE

Član 1.

Ovim Kriterijima propisuje se način izbora Učenika generacije završnih razreda opće i paralelne osnovne škole u Kantonu Sarajevo.

Član 2.

Učenicom generacije može postati onaj kandidat koji ispunjava slijedeće uvjete:

1. da je u toku školovanja imao odličan uspjeh u svim razredima;
2. da je u toku školovanja imao primjerno vladanje;
3. da se u toku školovanja isticao u radu sekcija slobodnih aktivnosti;
4. da je učenik škole u kojoj je kandidat za Učenika generacije najmanje 4 posljednje godine školovanja.

Član 3.

Prilikom vrednovanja za izbor Učenika generacije u obzir se uzimaju rezultati u radu registrovanih sekcija u školi, takmičenja u znanju i stvaralaštvu iz pojedinih predmeta i osvajanja nagrada na pojedinim takmičenjima, zatim učešće i osvajanje nagrada na raznim konkursima likovnog, muzičkog, jezičkog i tehničkog stvaralaštva te raznim sportskim aktivnostima provedenim u organizaciji matične škole, Prosvjetno-pedagoškog zavoda Ministarstva obrazovanja, nauke i informisanja, Federalnog ministarstva obrazovanja, nauke, kulture i sporta, te evropskih i svjetskih asocijacija koje se bave pitanjem odgoja i obrazovanja.

Član 4.

Elementi koji se vrednuju pri rangiranju kandidata za Učenika generacije su:

ELEMENTI	Maksimalan broj bodova
1. Uspjeh u učenju tokom osnovnog školovanja	100
2. Aktivnosti i doprinos u radu sekcija škole	40
3. Uspjeh na takmičenjima u znanju iz pojedinih predmeta	96
4. Uspjeh na konkursima, revijama, smotrama, izložbama i sl.	84
5. Uspjeh u sportu	50
6. Rukovođenje odjeljenskom zajednicom	24
7. Mišljenje Nastavničkog vijeća škole	20
UKUPNO	414

Član 5.

Pravo da bude izabran ima svaki učenik - kandidat završnog razreda koji ispunjava uvjete iz čl. 2. i 3. ovih Kriterija, prijavljivanjem na Oglas kojeg raspisuje matična škola.

II. NAČIN VREDNOVANJA AKTIVNOSTI

Član 6.

Aktivnosti iz čl. 2., 3. i 4. ovih Kriterija vrednuju se na slijedeći način :

1. Suma prosječnih ocjena (zaokruženih na dvije decimale) na kraju svake školske odnosno nastavne godine za završni razred pomnožena sa koeficijentom 2,5.

Napomena: Ukoliko je kandidat za Učenika generacije neki od razreda završio u inostranstvu i nema izvedenu ocjenu opšteg uspjeha ili nema pojedinačnih ocjena za nastavne predmete u nekom od tih razreda, onda se umjesto prosječne ocjene uspjeha u tim razredima uzima prosječna ocjena izvedena za sve razrede u kojima su definisane te ocjene, odnosno u kojima je moguće izvesti prosječnu ocjenu općeg uspjeha zaokruženu na dvije decimale.

2. Za svaku godinu rada u sekcijama slobodnih aktivnosti na osnovu vođene evidencije kandidat po sekciji u svakom razredu dobije 2 boda, pri čemu se od I – IV razreda boduju maksimalno dvije sekcije po razredu, a od V – VIII razreda maksimalno tri sekcije po razredu.

3. Za učešće i osvojeno mjesto na školskom, opšinskom, kantonalnom, federalnom, državnom takmičenju, školskoj olimpijadi, evropskom i svjetskom takmičenju u znanju iz pojedinih predmeta kandidat može dobiti slijedeći broj bodova:

	Nivo takmičenja	B r o j b o d o v a			
		I mjesto	II mjesto	III mjesto	Učešće
A	Školsko takmičenje	3	2	1	0,5
B	Općinsko takmičenje	4	3	2	1
C	Kantonalno takmičenje	5	4	3	2
D	Federalno takmičenje	6	5	4	3
E	Državno takmičenje	7	6	5	4
F	Olimpijade znanja, evropska i svjetska takmičenja	9	8	7	6

Ukoliko se održava samo ekipno takmičenje, kandidatu koji je bio član te ekipe pripada 30% bodova od bodova predviđenih za pojedinačni plasman.

Maksimalan broj bodova koji se može dodijeliti kandidatu po ovom osnovu je 96.

4. Za osvojeno mjesto na konkursima likovnog, jezičkog, dramskog, recitatorskog, literarnog i tehničkog stvaralaštva – revije, izložbe, smotre i slične manifestacije:

	Nivo takmičenja	B r o j b o d o v a			
		I mjesto	II mjesto	III mjesto	Učešće
A	Školsko takmičenje	3	2	1	0,5
B	Općinsko takmičenje	4	3	2	1
C	Kantonalno takmičenje	5	4	3	2
D	Federalno takmičenje	6	5	4	3
E	Državno takmičenje	7	6	5	4
F	Olimpijade, evropska i svjetska takmičenja	9	8	7	6

Ukoliko se održava samo ekipno takmičenje, kandidatu koji je bio član te ekipe pripada 20% bodova od bodova predviđenih za pojedinačni plasman.

Napomena: Kod tehničkog stvaralaštva se boduje jedno priznanje i to ono koje nosi više bodova na smotri.

Maksimalan broj bodova koji se može dodijeliti kandidatu po ovom osnovu je 84.

5. Za uspjeh u sportskim takmičenjima:

	Nivo takmičenja	B r o j b o d o v a			
		I mjesto	II mjesto	III mjesto	Učešće
A	Školsko takmičenje	3	2	1	0,5
B	Općinsko takmičenje	4	3	2	1
C	Kantonalno takmičenje	5	4	3	2
D	Federalno takmičenje	6	5	4	3
E	Državno takmičenje	7	6	5	4
F	Olimpijade, evropska i svjetska takmičenja	9	8	7	6

Ukoliko se održava samo ekipno takmičenje, kandidatu koji je bio član te ekipe pripada 20% bodova od bodova predviđenih za pojedinačni plasman.

Maksimalan broj bodova koji se može dodijeliti kandidatu po ovom osnovu je 50.

6. Za svaku godinu rukovođenja odjeljenskom zajednicom kandidatu pripadaju po 3 boda.

7. Tajnim glasanjem Nastavničko vijeće škole daje svoj glas za Učenika generacije s tim što onaj učenik koji dobije najveći broj glasova Nastavničkog vijeća dobija 20 bodova, drugi po broju glasova 15 bodova, a treći 10 bodova.

III. IZBOR UČENIKA GENERACIJE

Član 7.

Paralelne osnovne škole i specijalne škole izbor Učenika generacije mogu vršiti na osnovu dodatnih kriterija, regulisanih svojim normativnim aktom, u skladu s ovim Kriterijima.

Učenik koji je stekao uslove za proglašavanje učenika generacije u paralelnoj i općoj osnovnoj školi u isto vrijeme može određene prinadležnosti (eventualne novčane nagrade i druga priznanja) ostvariti samo u jednoj školi i to, u pravilu, u općoj osnovnoj školi.

U ovom slučaju odgovarajuće prinadležnosti i druga priznanja u drugoj školi koristi učenik koji je drugi na rang listi za učenika generacije.

Učenik iz stava 2. ovog člana od druge škole dobija posebno priznanje.

Član 8.

Praćenje, prikupljanje prijedloga i sumiranje rezultata u školi vrši Komisija za izbor učenika generacije.

Komisiju iz prethodnog stava imenuje Nastavničko vijeće škole.

Član 9.

Komisiju sačinjava pet članova: pedagog-psiholog škole koji je ujedno i predsjednik komisije, dva nastavnika (po jedan iz reda nastavnika razredne nastave i nastavnik predmetne nastave), predstavnik roditelja kojeg predlaže Savjet roditelja i jedan učenik sedmog razreda kojeg predloži savjet učenika ili Nastavničko vijeće ukoliko nije formiran savjet učenika škole.

Za člana komisije ne mogu biti birani: odjeljenjske starješine završnih razreda, kao ni učitelji koji su vodili generaciju završnog razreda, te roditelj čije je dijete kandidat za Učenika generacije.

Član 10.

Po prikupljenim podacima i provjeri istih, pristupa se bodovanju. Na osnovu broja bodova Komisija sastavlja rang listu i oglašava je.

Ukoliko dva ili više kandidata imaju jednak broj bodova, prednost ima učenik koji ima veći broj bodova za uspjeh u učenju. Ukoliko i po ovom osnovu učenici imaju jednak broj bodova, prednost ima onaj učenik koji ima veći broj bodova za uspjeh na takmičenjima. Ukoliko i po ovom osnovu dva ili više učenika imaju jednak broj bodova prednost ima onaj učenik koji ima veći broj bodova po osnovu uspjeha na konkursima, revijama, smotrama i slično. Ukoliko i po ovom osnovu dva ili više učenika imaju jednak broj bodova prednost ima onaj učenik koji ima veći broj bodova po osnovu uspjeha u sportu. Ukoliko i po ovom osnovu dva ili više učenika imaju jednak broj bodova prednost ima onaj učenik koji ima veći broj bodova na osnovu ocjene nastavničkog vijeća.

Član 11.

Komisija o svom radu vodi zapisnik i dostavlja ga odjeljenjskim zajednicama osmih razreda na razmatranje.

Član 12.

Nastavničko vijeće škole razmatra prijedlog Komisije i eventualne primjedbe odjeljenjskih zajednica ili kandidata za Učenika generacije i donosi odluku o izboru Učenika generacije škole.

Član 13.

Prigovor ili žalba na odluku Nastavničkog vijeća podnosi se Upravnom odboru škole u roku od 3 dana nakon proglašenja Učenika generacije.
Odluka Upravnog odbora je konačna.

Član 14.

Rok za proglašenje Učenika generacije je kraj nastavne godine.

Član 15.

Na panou škole ističe se uvećana fotografija Učenika generacije i pojedinačne fotografije prvih deset učenika kandidata sa rang liste.

Ukoliko škola ima manji broj kandidata za učenika generacije od deset, ističu se fotografije svih kandidata koji su konkurisali.

Član 16.

Škole su dužne da dostave do 10. juna odluku o proglašenju Učenika generacije, biografiju i fotografiju Učenika generacije Ministarstvu obrazovanja nauke i informisanja Kantona Sarajevo - Prosvjetno-pedagoškom zavodu.

Proglašenje Učenika generacije odgojno-obrazovnih ustanova kantona Sarajevo vrši se do kraja juna tekuće godine.

Općine ili drugi zainteresirani subjekti mogu da za Učenika generacije organizuju odgovarajuće manifestacije i osiguraju sredstva za nagrade i organizovanje manifestacije.

Pokrovitelj centralne manifestacije je Ministarstvo obrazovanja, nauke i informisanja Kantona Sarajevo, a organizator Prosvjetno-pedagoški zavod.

Član 17.

Učenik generacije se proglašava javno.

Član 18.

Učenik generacije dobija posebnu diplomu "Učenik generacije" koja je sastavni dio ovih kriterija, a ostali kandidati iz člana 15. dobijaju diplomu "Ponos generacije" koju dodjeljuje škola.

U skladu sa materijalnim mogućnostima Ministarstva, grada, općine, škole i drugih zainteresiranih, učenicima generacije se mogu dodijeliti novčane nagrade i odgovarajući pokloni.

IV. PRIJELAZNE I ZAVRŠNE ODREDBE

Član 19.

Izmjene i dopune ovih Kriterija donose se na način i po postupku po kojima su i doneseni ovi Kriteriji.

Član 20.

Kriteriji stupaju na snagu danom donošenja.

Broj: 11-01-38-7834/2002

Datum: 03.04.2002. godine

MINISTAR

Esma Hadžagić, prof.



Na osnovu Zakona o osnovnom obrazovanju i odgoju ("Službene novine Kantona Sarajevo" br. 7/98 i 9/2000), člana 18 Pravilnika o praćenju, vrednovanju i ocjenjivanju učenika osnovnih i srednjih škola Kantona Sarajevo i člana 19. Kriterija o izboru učenika generacije osnovne škole donosim

IZMJENU I DOPUNU
KRITERIJA O IZBORU UČENIKA GENERACIJE OSNOVNE ŠKOLE

I

U Kriterijima o izboru učenika generacije osnovne škole Broj: 11-01-38-7834/2002. u Članu 2. Tačka 4. se mijenja i glasi:

"4. Da je učenik škole u kojoj je kandidat za učenika generacije najmanje 4 posljednje godine školovanja ili ukupno najmanje 6 godina školovanja."

II

Izmjene i dopune Kriterija o izboru učenika generacije osnovne škole stupaju na snagu danom donošenja.

Broj: 11-01-38-7834-1/2002

Datum: 07.05.2002. godine

MINISTAR

Esma Hadžagić, prof.

Obrazloženje:

Na prijedlog Savjeta direktora osnovnih škola 03.04.2002. godine donijela sam Kriterije o izboru učenika generacije osnovne škole koji su dostavljeni svim osnovnim školama Kantona Sarajevo. Nakon konkretne primjene Kriterija nekoliko škola mi se obratilo i iskazalo mišljenje da je u ovakvom karakterističnom vremenu promjene mjesta prebivališta pa time i škole, prestrog kriterij da za učenika generacije mogu konkurisati samo oni učenici koji su najmanje posljednje četiri godine proveli u školi u kojoj su se zatekli u VIII razredu. To se posebno odnosilo na istaknute učenike koji su se kao stipendisti školovali jednu godinu u inostranstvu. Cijeneći navedena mišljenja i prijedloge donijela sam odluku kao u dispozitivu.



Na osnovu Zakona o osnovnom obrazovanju i odgoju ("Službene novine Kantona Sarajevo" br. 7/98, 9/2000 i 18/2002), člana 18 Pravilnika o praćenju, vrednovanju i ocjenjivanju učenika osnovnih i srednjih škola Kantona Sarajevo i člana 19. Kriterija o izboru učenika generacije osnovne škole donosim

IZMJENU I DOPUNU KRITERIJA O IZBORU UČENIKA GENERACIJE OSNOVNE ŠKOLE

Član 1.

U Kriterijima o izboru učenika generacije osnovne škole Broj: 11-01-38-7834/2002. u Članu 2. Tačka 4. se briše.

Član 2.

U Članu 3. iza stava 1. dodaju se dva nova stava koji glase:

"U cilju jednoobraznog pristupa, Prosvjetno-pedagoški zavod će svim osnovnim školama blagovremeno, a najkasnije do 15 aprila tekuće školske godine, dostaviti ažuriran spisak takmičenja koji će se u skladu sa stavom 1. vrednovati u toj školskoj godini.

U slučaju da se na spisku iz stava 2. ne nalaze neko takmičenje koja se po mišljenju škole, učenika, roditelja i drugih treba vrednovati, konačan sud po zahtjevu o tom takmičenju donosi Prosvjetno pedagoški zavod kome se i upućuje eventualni zahtjev."

Član 3.

Član 4. Kriterija se mijenja i glasi:

"Elementi koji se vrednuju pri rangiranju kandidata za Učenika generacije su:

ELEMENTI	Maksimalan broj bodova
1. Uspjeh u učenju tokom osnovnog školovanja	100
2. Aktivnosti i doprinos u radu sekcija škole	40
3. Uspjeh na takmičenjima u znanju iz pojedinih predmeta	96
4. Uspjeh na konkursima, revijama, smotrama, izložbama i sl.	84
5. Uspjeh u sportu	50
6. Rukovođenje odjeljenskom zajednicom	8
7. Mišljenje Nastavničkog vijeća škole	20
UKUPNO	398

Član 4.

U članu 6. u Tački 5. iza tabele sa brojem bodova unosi se tekst koji glasi:

“Ako je kandidat za učenika generacije osvojio jedno od prva tri mjesta na takmičenju u organizaciji sportskih klubova, po osnovu tih rezultata pripada mu 50% od broja bodova utvrđenih za odgovarajući nivo takmičenja u prethodnoj tabeli.

Član 5.

U članu 6. Tačka 6. se mijenja i glasi:

“**6.** Za svaku godinu rukovođenja odjeljenskom zajednicom kandidatu pripada po 1 bod.

Član 6.

U članu 6. Tačka 7. se mijenja i glasi:

“**7.** Nastavničko vijeće tajnim glasanjem kandidatima za učenika generacije dodjeljuje

A

broj bodova po osnovu formule: $\frac{A}{B} \times 20$; pri čemu je

B

A- broj glasova koji je učenik dobio

B- ukupan broj članova Nastavničkog vijeća koji su učestvovali u glasanju.

Član 7.

Izmjene i dopune Kriterija o izboru učenika generacije osnovne škole stupaju na snagu danom donošenja.

Broj: 11-01-38-5247/2003

Datum: 31.03.2003. godine

MINISTAR

Doc.dr. Emir Turkušić